

Na osnovu člana 13. stav 2. alineja 17. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj 49/06 i 51/09), člana 25. stav 1. alineja 17. Statuta Grada Tuzle (“Službeni glasnik Grada Tuzla”, broj 6/21) i člana 169. Poslovnika Gradskog vijeća Tuzla - drugi prečišćeni tekst (“Službeni glasnik Grada Tuzla”, broj 5/22), Gradsko vijeće Tuzla, na sjednici održanoj 19. 12. 2024. godine, donosi

ODLUKU

o izmjeni Poslovnika Gradskog vijeća Tuzla

Član 1.

U Poslovniku Gradskog vijeća Tuzla - drugi prečišćeni tekst („Službeni glasnik Grada Tuzla“, broj: 5/22) član 22. mijenja se i glasi:

„Član 22.

Politička stranka, koalicija, nezavisni kandidat i lista nezavisnih kandidata, koji su osvojili mandat na posljednjim lokalnim izborima, mogu formirati klub vijećnika kao poseban oblik svog političkog djelovanja.

Klub vijećnika može formirati jedan vijećnik iz reda nacionalnih manjina ako nije član niti jednog Kluba vijećnika u Gradskom vijeću.“

Član 2.

Ova Odluka stupa na snagu narednog dana od dana objavljivanja u „Službenom glasniku Grada Tuzla“.

GRAD TUZLA
Gradsko vijeće
Broj: 01/04-A-19570-2024
Tuzla, 19. 12. 2024. godine

PREDSJEDAVAJUĆA
Ana Pejić, BA prava

Obrazloženje

Pravni osnov

Pravni osnov za donošenje odluke o izmjeni Poslovnika Gradskog vijeća Tuzla - drugi prečišćeni tekst ("Službeni glasnik Grada Tuzla", broj 5/22) sadržan je u sljedećim odredbama:

- odredbama člana 13. stav 2. alineja 17. Zakona o principima lokalne samouprave u Federaciji Bosne i Hercegovine („Službene novine FBiH“, broj 49/06 i 51/09) kojim je propisano da *“vijeće u okviru svojih nadležnosti donosi poslovnik o svom radu”*.

- odredbama člana 25. stav 1. alineja 17. Statuta Grada Tuzla ("Službeni glasnik Grada Tuzla", broj 6/21) kojim je propisano da *“Gradsko vijeće u okviru svoje nadležnosti donosi svoj poslovnik o radu”*.

- i odredbama člana 169. Poslovnika Gradskog vijeća Tuzla - drugi prečišćeni tekst ("Službeni glasnik Grada Tuzla", broj 5/22) kojim je propisano da se izmjene i dopune Poslovnika vrše po postupku istom kao i za njegovo donošenje.

Razlog za donošenje

Vijećnici parlamentarne većine u Gradskom vijeću Tuzla smatraju da su političke stranke koje participiraju sa po jednim vijećnikom u Gradskom vijeću Tuzla u neravnopravnom položaju, te smatraju da imaju pravo da se organizuju u okviru kluba vijećnika.

Iz navedenog razloga je predloženo da Gradsko vijeće Tuzla donese odluku o izmjeni Poslovnika Gradskog vijeća Tuzla.

Obrazloženje pojedinih odredbi

Članom 22. Poslovnika Gradskog vijeća Tuzla propisano je ko može formirati klub vijećnika kao poseban oblik svog političkog djelovanja. Predloženim izmjenama definiše se da klub vijećnika kao poseban oblik svog političkog djelovanja mogu formirati politička stranka, koalicija, nezavisni kandidat i lista nezavisnih kandidata, koji su osvojili mandat na posljednjim lokalnim izborima, mogu formirati klub vijećnika kao poseban oblik svog političkog djelovanja kao i da klub vijećnika može formirati jedan vijećnik iz reda nacionalnih manjina ako nije član niti jednog Kluba vijećnika u Gradskom vijeću.

Finansijska sredstva

Nakon što Gradsko vijeće Tuzla donese odluku o izmjeni Poslovnika Gradskog vijeća Tuzla, bit će potrebno obezbijediti dodatna finansijska sredstva u Budžetu Grada Tuzla na poziciji Gradskog vijeća.

Predlagač:

vijećnici parlamentarne većine u Gradskom vijeću Tuzla